



Udruženje/udruga “BH novinari”, Kralja Tvrtka 5/5, 71000
Sarajevo Telefoni: 033 223 818, 033 217 302
E-mail: bhnovinari@bhnovinari.ba, WEB: www.bhnovinari.ba



LINIJA ZA POMOĆ NOVINARIMA / FREE MEDIA HELP LINE

OPĆINA KAKANJ

OPĆINSKO VIJEĆE KAKANJ

n/r gospodina Slavena Katičića, predsjedavajućeg Općinskog vijeća Kaknja

KABINET NAČELNIKA

n/r gospodina Mirnesa Bajtarevića, načelnika Općine Kakanj

POLICIJSKA STANICA KAKANJ

n/r gospodina Kenana Zaimovića, načelnika Policijske stanice Kakanj

Datum: 27.11.2025.

Mjesto Sarajevo

Broj protokola: 01-34/25

Predmet: *Zahtjev za brisanje dijela tačke 19, člana 3 Odluke o javnom redu i miru Općine Kakanj, objavljene u Službenim novinama Općine Kakanj broj 5/25*

Cijenjena gospodo,

Pišem vam u ime Upravang odbora Udruženje/udrge BH Novinari sa zahtjevom da, u skladu sa svojim ovlastima i odgovornošću, pokrenete postupak za brisanje spornih dijelova tačke 19, člana 3 Odluke o javnom redu i miru Općine Kakanj, donesene 27.03.2025. godine i objavljene u Službenim novinama Općine Kakanj broj 5/25.

Naš se zahtjev temelji na međunarodnim standardima zaštite prava na slobodu izražavanja i mišljenja putem društvenih mreža i mogućnosti zlonamjernog pokretanja prekršajnih postupaka protiv osoba koje putem društvenih mreža iznose svoje mišljenje i kritičke komentare. Ukazujemo i na činjenice da je tretiranje društvenih mreža kao jedne vrste “javnog prostora” na koji se može primjenjivati ova Odluka o javnom redu i miru, u

suprotnosti sa članom 10. Evropske konvencije o zaštiti ljudskih prava i sloboda, te drugim međunarodnim aktima koji štite slobodu govora i mišljenja, ne samo u medijima, već i na društvenim mrežama.

Također, u kontekstu pravnog tumačenja člana 3 Odluke i njegove tačke 19, u okviru koje se društvene mreže tretiraju kao mjesto/prostor na kojem se mogu počiniti djela prekršaja (kao što su: prijetnje, vrijeđanje, omalovažavanje, nepristojno ili drsko ponašanje ili drugi vid uznemiravanja građana ili službenih lica), **Odluku i navedene odredbe razumijemo i kao ciljani pokušaj ograničavanja prava na slobodu izražavanja stanovnika Općine Kakanj, uključujući i novinare i medije, posebno u kontekstu kritike javnih zvaničnika, njihovog ponašanja i načina na koji obnašaju svoje javne funkcije plaćene novcem građana.** Naša argumentacija u smislu ciljnog ograničavanja prava na slobodu izražavanja i mišljenja stanovnika Općine Kakanj, temelji se na slijedećoj argumentaciji:

(a) U članu 2. predmetne Odluke, **ne navode se društvene mreže kao prostor/mjesto na kojem je moguće počiniti djela prekršaja**, iako se detaljno definišu i opisuju sva druga mjesta i okolnosti mogućeg počinjenja prekršaja.

(b) **Odredbe ove odluke su u suprotnosti ili nisu harmonizovane sa višim zakonskim aktima**, kao što su *Zakon o prekršajima Federacije BiH* i *Zakon o prekršajima protiv javnog reda i mira Zeničko-dobojskog kantona*.

(c) Neka od **djela, koja se u Odluci navode i tretiraju kao prekršaji, već su regulirana građanskim pravnim postupcima** kroz *lex specialis* *Zakon o zaštiti od klevete Federacije BiH*.

Postavlja se logično pitanje: zašto je potrebno ova pitanja regulirati odlukama lokalnih vlasti, konkretno Općine Kakanj, kad su ona već zakonski definirana na drugim nivoima zakonodavne vlasti? Želi li se spornim odredbama Odluke o javnom redu i miru građane Općine Kakanj staviti u neravnotežan položaj u odnosu na druge građane BiH, pa ih kažnjavati po više osnova istovremeno: kroz prekršajne postupke, građansku parnicu ili čak i krivično zakonodavstvo, ako je riječ o ozbiljnim prijetnjama po život i sigurnost!?

Želimo podsjetiti kako su se BH Novinari u augustu ove godine očitovali o predmetnoj Odluci u jednom konkretnom slučaju, te tražili povlačenje spornih odredaba. Činjenica da je taj slučaj riješen „dogovorom“ dvije strane uključene u ovaj slučaj, ne dovodi u pitanje potrebu i opravdanost brisanja društvenih mreža iz tačke 19 člana 3. Odluke o javnom redu i miru Općine Kakanj.

Kao profesionlano udruženje novinara i organizacija koja se zalaže za vladavinu prava i istovremenu zaštitu ljudskih prava, posebno prava na slobodu izražavanja i mišljenja, mi podržavamo precizne zakonske odredbe koje su usklađene sa međunarodnim standardima

slobode izražavanja i mišljenja, te odredbama Ustava i zakona Bosne i Hercegovine. Smatramo kako se sloboda izražavanja i mišljenja ne smije zloupotrebjavati niti neproroporcionalno ograničavati! Držimo neprihvatljivim i to da se sloboda izražavanja putem društvenih mreža ograničava općinskim odlukama, da bi se onda „spašavala“ pojedinčnim dogovorima u slučajevima kada prevlada razum ili kada praksu nadjača snaga političkih i institucionalnih pritisaka.

U skladu sa naprijed navedenim, upućujemo vama – vijećnicim Općinskog vijeća Kakanj i svim drugim odgovornim tijelima lokalne vlasti, zahtjev za brisanje sintagme „društvene mreže“ iz tačke 19 člana 3 Odluke o javnom redu i miru Općine Kakanj, donesene 27.03.2025.godine i objavljene u Službenim novinama Općine Kakanj, broj 5/25.

Hvala na razumijevanju i prihvatanju našeg zahtjeva.

S poštovanjem,

U ime Upravnog odbora BH Novinara:

B. Rudić



Borka Rudić, generalna tajnica